

蘇平仲文集

五

蘇平仲

PDG

蘇平仲文集卷之十三



誌表述

章貢黎詠校正重刊

政元溫州路同知平陽州事孔公墓誌銘

至正末方國珍據台慶溫用名士以收人心凡士居其地者不爲所用則爲所禍而其於公也不得而用之亦不得而禍之四方之士聞而莫不高其風國初胡仲淵以王府叅軍鎮括將進公于朝而先之以書幣公返其書幣謂使者曰使孔陽一出足於天下重雖強顏從叅軍後亦不辭不然何益况吾父年垂九十不可頃刻去左右叅軍奈何欲使之胥爲不忠孝人耶仲淵愧其言而止洪武元年按察僉事趙壽將使指求賢所東得公於溫以應詔公終辭不起士益以是高之公神明之胄起家爲名進士仕州縣爲良吏師學爲儒宗當世尊而仰之

不在彼而在此也。公自幼篤志於學，警悟強記，絕人而諸經史百氏之書罔不該貫。取元統乙亥鄉薦，溫之士以春秋貢者自公始。方上春官而科舉廢，南歸以衍聖公思晦舉署永嘉書院山長。未上而科詔復下，至正元年再薦于鄉。登二年進士第，擢衢州路錄事。階將仕郎九年，轉從仕郎。處州路慶元縣尹代歸，以二親年高，絕口不言仕進。十九年中書參政晉頴不花公內臺治書李公國鳳經畧江南，得便宜除拜承制授公溫州路同知。平陽州事使得便養，公奉檄欣然而起，其爲錄事於衢也下車適大旱，以郡守命禱徐偃王祠，下未復命而雨如注，莫不驚異。民汪明之兄弟爭家財，吏展轉迷賂數歲不決。公問汪曰：「兄弟親孰與吏？」汪對曰：「兄弟同產，吏途人爾。」公曰：「弊同產以資途人，汝何不思之甚耶？」其兄弟立感悟，叩頭曰：「不敢復煩官府矣。」

廉訪會事寶賢公行部莅獨委以難決之獄凡所平反無不服
其明允遂以最聳朝廷遣使分道宣撫過衢得公治狀甚禮遇
之其爲令於慶元也會分憲余公闕以括賦役不均舉行覈實
各縣皆釋人往董之惟慶元就以屬公乃令民以田畝多寡自
占卽不實罪及隣保立法周而用法嚴民自占無敢不以實賦
以田制役以賦定富者幸免貧下重困之患遂除余公自爲書
遣吏勞以公堂酒學宮在縣西大溪之北公始視事進謁阻水
不得前聞舊有詠歸橋直神力院左廢且數十年卽經營興復
之六月而成其脩七百尺其廣三十尺覆以屋爲間四十有九來
往者便之壬辰歲侵縣西鄰小民六十餘人稱貸於富民弗從
強委刑而發其原以去富民忿之訴公以爲強劫公惻然曰彼
艱食冀活性命乃爾情亦可矜矣今以其活性命者戕其性命

吾不忍爲也若何獨忍乎富民愧謝而退閩寇犯縣境公能以義兵擊退之民賴以安急於仕者率縛平民繳賞與公曰軍功與民命孰重輒解其縛而縱之平陽鄉邑也時行樞密院判官周嗣德行州事公不矯以爲異不比以爲同事無大小一裁以法雖族端不少假借之君子稱其識大體爲平陽三歲丁母恭人憂解官明年州人以版圖上于職方公與陳子上者慨然有浮海之志願父判府公在堂子上入閩公羈孤無爵却掃一室名曰絮庵情有所觸輒仰書空而已後三年而判府公捐館公年六十三而執喪哀毀又十六年公以疾不起洪武壬戌七月二十七日也得年七十有九臨終謂諸子曰吾今而後有以下見曾大父于地矣蓋公之曾大父曰景行宋太學內舍生度宗辛學循故事官先聖子孫賜同進士出身授慶元府學教授

陞從政郎主管禮兵部架閣文字宋亡不復仕是以云架閣之
子曰士璘元永嘉縣學教諭後以子貴贈從仕郎曲阜縣尹曲
阜之子昂入用翰林郎公陶孫薦歷永新州學正龍溪書院山
長江州路儒學教授湖口縣主簿璉元會稽兩縣尹以承務郎
松江府判官致仕公其嫡也諱暢字子升生於大德甲辰正月
十九日母蔡人許氏湖廣儒學提舉涪齋先生善勝之女娶二
氏封恭人以大德丙午三月十一日生以洪武己卯十二月三
日卒葬縣西之筆輿子男五人諒說詳訓王出也誌側室陳出
也詳訓早亡女三人皆已行而卒孫男四人宏寔遠望女七人
長適林與方次適項愉餘未行平生所爲詩文總十二卷曰累
庵集藏于家諒等卜以十六年癸亥十一月十日合葬于筆輿
屬其門人蒙陰縣主簿林與直爲狀來請銘伯衡晚陋不足以

知公竊窺公當運去物改之後不降其志而得明哲保身之道
善於用晦而不失出處去就之義可謂無愧古之仁人矣論次
而顯銘之百世之下寧不尚有觀感而興起者乎銘曰

恂恂孔公宜聖之孫道深皇王學貫天人宏中肆外而鳴以文
迺旅後造迺充國寶迺綰章綬有社有民敏於爲政一本於仁
世運俄否歸伏海濱

大明受命萬國維新求賢有 詔使者在門引疾堅卧耳若不
聞所執者節匪絜其身優游令終允矣全臣肇興之原歸焉立
墳勒銘于石千載弗諼

故元朝請大夫僉太醫院事包公墓誌銘

洪武元年八月我師取北平士大夫在班行而位望隆兼首勛
遣赴南京中道又例貶鳳陽時公以列卿在遣中欣欣詣聚所

曰吾國亡而吾不能與之俱亡有餘罪矣是行固當既而有旨
將授以官公蹙然曰終不克此執灌將而旅膚敬異曰何以見
舊君於地下發憤而卒二年三月廿八日也享年七十有五其
子守忠奉柩東歸遂以五年十一月二十一日附于上黨郡夫
人之墓後十年守忠奉秦府紀善黃伯生所爲狀立請曰先君
之死志不白於當世小子瞿焉倘於而畀之銘則先君雖死不
死矣伯衡年十五六侍遊廣東即服膺公之名茲又辱交守忠
誼不得以不文爲辭按公諱容德字子成姓包氏處州麗水人
曾大父諱某大父諱開父諱任本宋孝子陳茂元八世孫宋後
包氏公貴顯大父累贈朝列大夫同僉太常禮儀院事騎都尉
追封上黨郡伯妣郭氏上黨郡君父累贈亞中大夫集賢直學
士輕車都尉追封上黨郡侯妣金氏上黨郡夫人公少力學個

儻志不群甫踰冠涉淮汴周游陳宋齊魯之墟以至燕京氣岸魁偉議論辯博一時公卿爭願見之隱然名動京師會文宗晏駕周王當入繼大統親王往迎擇儒士有才畧者爲輔行乃以蜀公謁見周王于和林語稱旨面授翰林直學士行至上都之魚兒泊而周王遇害命遂寢公還京師後用御史大夫鐵穆爾普化薦擢海北廣東道肅政廉訪司照磨兼承發管勾架閣時使副以下皆坐事空一司以去公行使事有豪民十姓結勢要以重賂權顧出守宰上作威福以毒齊民號十虎前後使者爲所賂置不問公發其奸悉捕實獄十人者百方行賂規貸不可得竟徙海外民大悅服而郡縣吏皆知守法一道肅然御史署其考曰廉介無私仁明有斷徵入爲秘書監典簿奉旨宣諭江浙行省得乘傳齎贈封敕命歸爲親壽仍下璽書復其家鄉

邦榮之還朝轉著作郎集賢府君計聞南歸持服寢孝子墓差
葬其父語所親曰嚮吾出仕苟祿以養親也親今已矣何以仕
爲哉當築舍墓下隱居終吾身願妻子留于燕服闋復北上將
挈之俱南適中原兵起不果還自是所在雲擾國事日非公居
常鬱鬱不樂挽之仕不起愛育識黎立爲皇太子初左右親軍
都指揮司廷議以任事者舉世襲少年非佐以老成識大体者
不可廼以承直郎都威衛知事強起公不得已拜命衛號繁劇
公處之裕如而庭無留事未幾廣平王咬咬出爲遼陽行省丞
相素材公奏爲其省左右司都事以自佐廣平王行未至遼陽
而前中書省左丞相賀公太平代之賀丞相知公猶深以本省
理問官奏留進階奉訓大夫本省嘗承詔時粟數千萬斛涯頭
驛給軍餉設官居守一夕土寇焚抄殆盡事聞繫守者坐以自盜

株連數百人公馳至都堂白丞相曰今名都重鎮宿兵動以萬計寇掠府庫且不能禦而朝廷亦若罔聞知涯頭梁山積而居守官吏不滿數十人尚安能禦寇乎今繩之以法正所謂不能三年而總小功是察也丞相愧其言立命出繫者數百人賴以全活因留爲太醫院判官由判官陞同僉又以朝請大夫僉本院事公在京所主皆朝廷重臣冀寧王帖木而達識有古賢相之風所交皆天下士雅敬重公其當國有大事輒咨訪焉公亦爲之盡多所建明然未嘗有所請九轉官三在遐方而六居散地人益多其有守爲人剛直不阿雖用事者或有過面折之弗顧後其人慚悔至階門謝改之其爲一時嚴憚蓋如此敦本好義出於天性葬父日晝孝子墓割田以奉其祀至正末京畿蝗旱斗粟易白金二兩公月廩入輒分贍故舊家無餘粟人尤以

爲難善筆札初師智水蔡襄後自成一家爲詩清婉而典則於
書無不該貫下至鑒卜蒙古書亦洞其微臺閣名公咸慕而與
之交楊文安公侯斯歐陽文公玄張路公翦最親厚娶張氏封
上黨郡夫人子男三人長守文太常禮儀院掾史先卒次守禮
次郎守忠女三人山陰知縣張宣刑部尚書世列門祝金生其
婿也孫男四人

孫女二人尚幼於戲公當南士擯斥

之日奮取爵位如持左契非有大過人者則何以能爾在廣東
以模倣而克振揚風紀在遼陽以省屬而入與宰相抗論是非
使所居官皆要路其樹立當何如及乎運去鼎移則守志不降
竟死於憂憤而不失爲全臣雖平生所蘊不獲盡展復何憾哉
序而係之以銘百世之下欲知其人尚有考於斯乎銘曰

君子所貴大節爲先氣苟不充節何以完烈烈包公惟氣浩然

是以夷險直道而前公持憲度適伏摧奸公佐省垣正色危言
宰相知公公不板援瞻仰孝肅又何忝焉高岸爲谷滄海爲田
南冠而縶喟焉慨歎內省或疚生也何安德義無虧含英九臬
有死而已發憤廢餐是謂成仁先民所難紛紛鄙夫志與時遷
得寵遺義曾不覩顏不有公者孰障狂瀾太史勒銘于彼新阡
尚其烈思千萬斯年

逸叟處士徐君墓誌銘

溫州府儒學教授徐宗起得謝歸自京師謂伯衡曰竊聞古之
人不必皆能有以自見而卒有傳於後者以世有發明之者耳
惟我先處士隱約以終材無所試而志不獲就無以表見於當
時矣予其爲我發明之伯衡辭不斐之辭不足以寄重則自爲
狀固以請按狀處士孝友仁慈剛毅直諒父年老疾病謁醫者

療之弗愈乃徒跣走新羅山哀禱于山之神求以身代父病尋
愈咸以爲孝誠所格後七年父廼卒治喪執禮哀毀幾欲無主
事嫡母范氏生母朱氏備極愛敬待庶弟有恩意其婦喪爲再
聘其屋塋陋爲新作之有無相通白首無間言有異姓之親之
孤貧無以爲資致之家而衣食之長大爲娶然後聽其去如此
者二人焉家本墮也錢以予困乏者攜以資不能喪者汲汲若
不及尤刻意教諸子飭禮弊使師事鄉先生鄭如圭史伯璿時
時誨之曰業詩書之謂儒治法律之謂吏二者皆足以發身人
顧多樂從吏者不以吏之取效捷於儒之致用乎然儒術寬厚
而吏治刻深宅心既異則獲報亦殊天道不遠可不慎歟此吾
歌若等爲儒而無爲吏也族姍子弟亦以此訓之識者推爲名
言嘗語所親曰局促海濱欲聞見廣得乎吳楚齊魯幽冀之墟

多奇偉傑特之觀委身往遊斯快吾意耳一日躡履出門竟去遂抵燕都鄉人周提舉應奎素材處士言於中書左丞許公有士許公見處士容貌魁岸論議慷慨儒書吏律無不該洽甚器重焉即命授以官而主銓吏求賂處士曰吾唯不欲以賂得官以故在此使屑行賂則吾翱翔仕途久矣或勸宜俯就曰得不得命也因咄咄嗟喏曰輦轂之下而政以賄成中書欲用人而扼於銓曹藉令得官志可行乎哉遂南歸故邦日與親戚舊故縱飲劇談一不問斯世為何世去家五里地曰柏洋墾山爲田疏泉爲池結廬種樹有隱居終焉之志因自號逸叟於戲措行而於羹倫無愧出言而於風教有闕固可尚矣無寧不爲官職而不爲吏變所守不愈可尚乎若處士真善自樹立者矣而況宗起遽於經說掇履純固爲教授十年克以師道自任朝廷聞其

賢徵入將官之禁近引疾固辭今雖里居譽名日起極爲學者
所嚮觀其子如此則其義方之教積善之慶又可觀已而言行
畧不暴白亦君子之所不忍見哉伯衡烏得而沒諸處士諱必
交字仁卿姓徐氏其先閩人曰寅者實相王審知晉天福間其
子孫避亂來平陽故爲平陽人曾祖諱某祖諱入父諱繼老生
于至元壬辰十一月二十三日至正甲午年六十三避寇方全
鄉之仙桂里以疾卒于夏之四月四日冬十月癸亥葬其鄉之
壺嶺娶陳氏有賢行後四年卒卒後十四日附

國朝洪武乙卯諸子又卜地鳳林鄉梅源之鐵場遷而葬焉寔
十月庚戌也子男三人長曰應時其次曰興祖即宗起曰顯祖
皆側室黃氏出女二人一適郭季一適蔡晟孫男五人欽望升
伯珣女五人曾孫男二人敝敝銘曰

於戲孰有爲善而無報者乎奈何世之人闖闖於目前之効也
觀逸愛處士無營於世含章弗耀唯以詩書迪厥子而積善以
履壽之即世之後而其子遂膺妙東典郡教卓然以學行爲時
師表不尚有天道哉我銘其歲發其幽潛百爾君子其可不知
仰乎

宋君墓誌銘

至正癸未先人從事廣憲子成爲德慶路蒙古字學正先人以
子成多材藝朝夕過從當有資益言於官長使食其祿而留居
廣州憲帥二府甚敬禮之是時子成交余父子間莫逆也居三
年先人移閩闔子成亦調福祿寨巡檢廼別自是遂不復見因
之以世變亦不聞問後三十九年爲洪武癸亥余來平陽會其
子簡廼始知子成爲巡檢後四年年四十五竟卒矣嗚呼